

封
長
白
山
記

方象瑛 著

中
華
書
局

封長白山記

叢書集成初編所選學海類編
及龍威秘書皆收有此書兩本
如一學海在先故據以排印又
此書爲龍威說鈴之一

封長白山記

清 遼安方家瑛潤仁

康熙十有六年四月望上以長白山發祥要地特命內大臣覺羅武某一等侍衛兼親隨侍衛費祿色一等侍衛塞謐禮等於大暑前馳驛往五月四日啓行十四日至盛京二十三日至兀喇宣諭鎮守將軍等召村莊獵戶皆無知長白者都統尼雅漢族祖戴穆布魯世採獵以老退閒自言祖居額黑訥陰聞其父嘗云獵鹿長白山負以歸四日可抵家以此度之長白山距訥陰當不遠內問訥陰路幾何獵戶嚙喇大額黑等曰陸行十日水路乘小舟二十日乃命獵人喀喇前導各持三月糧又慮食盡馬乏不備獵也則將軍巴海載米一舟候于訥陰于是喝喇大額黑等由舟登羅率固山大薩布素由陸六月三日啓行經文德痕河阿虎山庫納訥林祁爾薩河渾沱河法布爾堪河納丹佛勒地方輝發江法河水敦林巴亞塔河納爾渾河敦敦山卓龍窩河凡數十處抵訥陰而喝喇大等亦至蓋自逆溯由瓦努湖河至佛多和河復順流至會纔七日耳十一日發訥陰一望林莽迷不得路薩布素率族中二百人伐木開道十二日悉衆行是日薩布素遣顧懷等先後馳報前進約百數十里登一山升樹而望遙見遠峯白光片片殆長白山也因留喝喇大額黑督采蛛蚌十四日與薩布素等會密樹茂林揣摩開路十六日黎明聞鶴鳴六七聲雲霧迷漫不復見山乃從鶴鳴處覓徑得鹿蹊循之以進則山麓矣始至一處樹木環密中頗坦而圓

有草無木。前臨水林盡處。有白樺木。宛如栽植。香木叢生。黃花爛漫。隨移駐林中。然雲霧漫漫。無所見也。衆惶惑。前誦綸音。禮甫畢。雲披霧捲。歷歷可觀。莫不歡呼稱異。遂攀躋而上。有勝地。平敞如臺。遙望山形。長闊近視。頗闊。所見白光。皆冰雪也。山高約百里。五峯環繞。憑水而立。頂有池。約三四十里。無草木。碧水澄清。波文蕩漾。繞池諸峯。望之搖搖若墜。觀者駭焉。南一峯稍低。宛然如門。池水不流。山間則處處有水。左流爲松阿里兀喇河。右流爲大小訥陰河。瞻眺之際。峯頭遊鹿一羣。皆駭逸。惟七鹿忽墜落。衆皆曰。神賜也。蓋登者適七人。時正乏食。拜而受之。回首望山。倏復雲霧。遂于十八日南回。至前登山高嶺處。一氣杳冥。并不見有山光矣。二十一日至二訥陰河合流處。二十五日至恰庫河。則訥陰東流合處也。二十九日由恰庫河。歷色克騰圖。白黑喝爾漢。喝大渾薩。滿薩克錫法克錫松阿里多渾。大江險絕處。凡九。七月二日。次兀喇。十二日抵甯古塔。徧問會甯諸府。八月二十一日還京。具疏聞上。以發祥之地。奇蹟甚多。山靈宜加封號。下內閣禮部議。封爲長白山之神。歲時享祀。如五嶽焉。夫封山之典。肇始唐虞。然報祀嶽瀆。非有關於鍾祥之自也。志稱長白山橫亘千里。南二百里。巔有潭。周八十里。南注爲鴨綠。北流爲混同。國家龍興所自。然至今無知其處者。容慮周詳。穆然念祖宗所由出。專官訪求。備歷險異。卒光大典。以答神庥。其享天心而致靈貺。宜哉。謹撫原疏。綴葺爲記。用誌千萬世無疆之盛云。